

REGIONAL NEWS

HEADLINES:-

1. Mizoram State Commission for Women (MSCW) chairperson Pi C. Lalchhandami chu a bang.
2. CDF-Hualngoram hovin an ruk bo Zokhawthar tleirawl Laltlanhlua leh Eliza -te chu Zirtawpni zan khan chhuah ANI.
3. Pianphunga rualbanlote infiamna kutpui, Paralympics 2024, Paris-a neih mek chu zanin hian khar a ni dawn.
4. Khaw kheng tuar ramte hnenah India-in tanpuina a thawn.

<><><>

MSCW CHAIRPERSON

Eptu MNF leh zirlai pawlte'n bang tura an nawr Mizoram State Commission for Women (MSCW) chairperson Pi C. Lalchhandami chuan banna a thehlut.

Social Welfare, Tribal Affairs, Women & Child Development Secretary hnenah Pi C. Lalchhandami hian nimin tlai khan a banna lehkha hi a thehlut a. A banna lehkha-ah chuan MSCW a chairperson atana ruat a nih chungchangah eptu political party-te atanga beihna nasa tak a tawh thu a tarlang a. He dinhmun hi kum 65 tlin thlenga chelh theih a nih avangin a kum dik tak ang chuan he dinhmun hi la chelh zui zel thei tur la niin a insawi a. Chutiang a nih rualin hetiangah boruak karah chuan chak tak leh tha tak, phur taka hnathawh zui a harsa dawna a hriat thu a sawi a. A awmna ZPM party hruaitute a biak rawn hnu-ah hetiangah party inchirhthehna tha lo tak awm zui tur chu tha a tih loh thu leh Women Commission zahawmna vawnhim na'n chairperson a nihna atanga banna a thehluh tak thu a sawi a ni.

Kumin March ni 8 a MSCW chairperson atana ruat Pi C. Lalchhandami hian he hna a chelh chung hian thubuai 102 lai an ngaihtuah hman thu leh za zela 80 lai an chinfel hman thu a banna lehkha-ah hian a tarlang a. A awm hma kum 5 chung, kum 2019 atanga February 2024 inkar chung khan thubuai 86 ngaihtuah hman a nih thu sawiin he dinhmun a chelh chung hian hmasawmna nasa tak an nei a a hriat thu a tarlang sbawk a ni.

MNF party chuan MSCW chairperson atana Pi C. Lalchhandami ruat a nih danah a kum chungchangah dan bawhchhiatna a awm niin an sawi a. Naktuk Thawhtanni tlailam dar 5 emaw a aia hma emaw a a ban loh chuan bang tura na zawka nawr an tum thu an lo sawi tawh a. Mizoram State Commission for Women Act, 2004 behchhan rules-ah kum 65 tling tawh chu Chairperson atan ruat theih a nih loh thu chiang taka a tarlan laiin sawrkar document hrang hrang leh Kohhran thil chhinchhiahna-ah te Pi Lalchhandami hian Chairperson atana ruat a nih hian kum 68-na a hmang mek tawh tih chiang takin a lang a ni an ti a. Kum 2016 khan kum 60 a tlin tawh avangin sorkar hna atangin a chawl niin an sawi a. A baptsima certificate-ah pawh March ni 30, 1956 a piang a nih thu a inziak niin an sawi bawk a. Naktuk tlai a a ban loh chuan na zawka nawr an tum thu an sawi a ni.

<><><>

STATE FINANCES AUDIT

Kum 2021-22 tangka kum chhunga Mizoram leibat tlingkhawm cheng vaibelchhe 10,570 leh nuai 93 chu kum 2022-23 khan cheng vaibelchhe 10,972 leh nuai 49-ah a pung chho.

Mizoram Principal Accountant General in kum 2022-2023 chhunga Mizoram sum dinhmun an endikna atanga an hmuhchhuah dan, tun hnai a thuchhuah siam atan tarlan danin, Mizoram leiba (outstanding liability) hi a pung zawngin a kal a. Kum 2022-23 chhunga Mizoram sum thawhchhuah atanga chhuta za zela 3 point 37 chu sum indaih lohna a ni a. Sum thawhchhuah atanga chhuta leiba awm hi za zela 33 point 42 zet a nih avangin Mizoram Fiscal responsibility and Budget Management (MZFRBM) Act danin a phut chu a pha thei lo a ni. Hemi hun chung vek hian hmasawna hna 291 thawhna atan cheng vaibelchhe 2,552 leh nuai 59 hman a ni chungin hna hi department hrang hrangin an thawk zo thei lova. Hemi avang hian hmasawna hna thawhte hi hman tangkai a ni thei lova. Zawh hun tur bituk anga thawh zawh loh hi kum 1 atanga kum 5 te a ni hlawm a. PHE, Power leh PWD-in hna an thawh zawh loh avanga sum sen belh ringawt pawh cheng vaibelchhe 87 leh nuai 19 a tling a ni.

Kum 2022-23 tangka kum chhung khan chhiat rupna thleng thin pualin sorkar laipui atangin State Disaster Response Fund (SDRF) hnuaiiah Mizoram sorkar chuan cheng vaibelchhe 39 leh nuai 20 a dawng a, Mizoram sorkarin a do let vena tur chu cheng vaibelchhe 4 leh nuai 36 a ni a. Mahse, heta sum ruahman a vaiin cheng vaibelchhe 43 leh nuai 56 hi SDRF-ah Mizoram sorkar chuan a chhunglut ta lo a ni.

Mizoram sum thawhchhuah hi kum 2022-23 khan za zela 17 point 99 in a pung a. Chutih lai chuan agriculture lama punna chu kum 2018-19 a za zela 12 point 35 a nih laiin kum 2022-23 ah chuan za zela 6 point 89 ah a tla thla thung a, industry lam pawh pung lovin a tlahniam a ni. Mizoram sum dinhmuna thil lawmawm lam ve thung erawh chu state-in a thawhchhuah ve State's Own Tax Revenue hi cheng vaibelchhe 247 leh nuai 88 a ni a, kum hmasa lam aia a punna hi za zela 29 point 2 zet a ni a. Non-Tax revenue pawh cheng vaibelchhe 405 leh nuai 65 niin kum hmasa aiin za zela 65 point 20 in a pung a ni.

Kum 2022-23-ah khan hmasawna lam atana hman tur ni lo, sorkar inrelbawlna leh hlauh ilo atan cheng vaibelchhe 10,092 leh nuai 39 hman a ni a. Budget a sum ruahman zawng zawng cheng vaibelchhe 11,416 leh nuai 22 atanga chhutin za zela 88 point 40 bial zet a ni a. Hmasawna hna thawhna atana sum ruahman chu za zela 11 point 6 chauh a ni.

Kum 2023 March ni 31 khan Mizoram sorkara Drawing and Disbursing Officer (DDO) 1,170 zinga 273-te chuan Savings leh Current Bank account-ah cheng vaibelchhe 262 leh nuai 56 an dah tih hmuhchhuah a ni bawk.

TEENS RELEASED

Pathianni hmasa a Chin Defence Force (CDF) - Hualngoram hovin an rukbo, tanina an tantir Zokhawthar tleirawl Laltlanhlua leh Eliza (kum 16 mi ve ve)-te chu Zirtawpni zan khan an rawn chhuah.

Zokhawthar khawtlang hruaitute leh YMA branch hruaitute hnen atanga thu dawn danin khawtlang hruaitute leh tlawmngai pawlte'n nasa taka nawr a CDF-Hualngoram hruaitute nena an inbiak hnu-ah tleirawl pahnihte hi chhuah an ni a. Myanmar ram chung Khawmawi khua ah chhuahin Zirtawpni zan hian Zokhawthar lamah khawtlang hruaitute hian an hruai thleng a ni. Laltlanhlua te thian dun an rukbo chhan hi CDF mi pakhat kut thlak a an puh vang niin an sawi a, Zokhawthar hruaitute erawh chuan chutiang chu a awm lo niin an sawi ve thung. Nilaini chawhma khan Laltlangvala leh Tatea (kum 18 mi ve ve) te chu CDF te hian an man bawk a, mahse, anni 2 hi chu Zokhawthar khawtlang hruaitute nen an inbiak hnu-in hemi zan dar 8 vel hian an chhuah leh nghal a ni.

Sipai intelligence report-in a sawi danin Laltlanhlua leh Eliza te hi CDF-Hualngoram kuta an awm lai hian an lu ziah kawlhsak an ni a, sikret nungin an lu leh taksa hmun dangah an dep a, chubakah pakhat zawk hi a ha hmai an thlawnsak a. Zokhawthar khawtlang hotute chuan an lu ziah kawlhsak an nih thu hi chu a dik tih an sawi. He thil thleng avang hian Zokhawthar leh a chheh velah boruak a tang hle a, chhuah an nih hnu-ah erawh chuan boruak sosang hi a dai zui leh mai ni a thudawn a ni.

<><><>

PARIS PARALYMPICS TO CONCLUDE

Kum 4 dana neih thin, pianphunga rualbanlote infiamna kutpui, Paralympics 2024, Paris-a neih mek chu zanin hian a tawp dawn ta a, tun tumah hian India aiawh-ten gold medal 7, silver 9 leh bronze 13, a vaiin medal 29 la in a pumpuiah 16-na an ni a, Paralympics-a India a chet that ber tum a tling a ni.

Kharna inkhawm hi India ram sanaa zanin dar 11:30-ah tan a ni ang a, gold medal la tu, Harvinder Singh leh Preethi Pal-ten India flag kengin India contingent hma an hruai ang. Kum 2028 Paralympic Summer Games chu Los Angeles-ah nghah a ni.

<><><>

INDIA SENDS RICE

Khaw kheng avanga harsatna nasa tawk mek, Malawi ram tanpui nan India-in buhfai Metric Ton sang 1 a thawn a, External Affairs Ministry sawi danin buhfai phur lawng lian hi nimin khan Nhava Sheva chawlh hmun atangin a chhuak a, hei hian El Nino avanga khaw kheng tuarte a chhawk zangkhai beisei a ni.

Malawi ram bakah hian India chuan Zimbabwe ram mipuite tan tanpuina a thawn bawk a, Zambia ramah vaimin MT 1300 thawnin Republic of Chad-ah damdawi pawimawh chi hrang hrang thahnem tak a thawn bawk a ni.

<><><>

PIC FACT CHECK

Press Information Bureau (PIB) chuan cheng sang 8-a PM Kusum Yojana registration tih sak thei nia insawia mi bum chingte lakah fimkhur turin mipui an ngen a, mi bum chingte hian registration fee an pek hnuah he scheme hnuai an dilna chu pawm ani ang tih pawmpuina lehkha lem an thawn a, hei hi inbumna thil a ni tih PIB Fact Check Unit chuan a sawi a ni.

<><><>